



Broj: UP-I-KSI-09-26/22

Datum: 06.04.2023. godine

Na osnovu člana 25. Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 04/21), Komisija za odlučivanje o sukobu interesa, postupajući po službenoj dužnosti, u predmetu utvrđivanja povrede odredaba navedenog Zakona od strane M.S. iz Brčkog, ulica [REDACTED], poslanika u Skupštini Brčko distrikta Bosne i Hercegovine, nosioca javne funkcije, na 51. sjednici održanoj dana 05.04.2023. godine, donijela je

RJEŠENJE

1. **UTVRĐUJE SE** da je M.S. iz Brčkog, ulica [REDACTED], poslanik u Skupštini Brčko distrikta Bosne i Hercegovine, kao nosilac javne funkcije postupila protivno članu 19. stav (1) i stav (2) i članu 20. Zakona o sprečavanju sukoba interesa u institucijama Brčko distrikta Bosne i Hercegovine na način da dana 12.01.2022. godine u podnesenom Izvještaju o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja-Aneks II Komisiji za odlučivanje o sukobu interesa nije prijavila nepokretnu imovinu bračnog druga kao i pokretnu imovinu bračnog druga vrijednosti veće od 5.000,00 KM.
2. Za učinjeno kršenje odredaba Zakona o sprečavanju sukoba interesa u institucijama Brčko distrikta Bosne i Hercegovine, M.S. se shodno članu 39. stav (1) tačka b) navedenog Zakona izriče novčana kazna, i to obustavom dijela isplate neto mjesečne plate, koju nosilac javne funkcije prima za obavljanje javne funkcije u iznosu od 10% (deset posto) neto plate.

Obrazloženje

Komisija za odlučivanje o sukobu interesa je po službenoj dužnosti zaključkom, broj: UP-I-KSI-09-26/22 od 21.12.2022. godine, pokrenula postupak za odlučivanje o povredi odredaba Zakona o sprečavanju sukoba interesa u institucijama Brčko distrikta Bosne i Hercegovine protiv nosioca javne funkcije M.S. iz Brčkog, ulica [REDACTED], poslanika u Skupštini Brčko distrikta Bosne i Hercegovine, jer je posumnjala u tačnost i potpunost podataka u podnesenom Izvještaju o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja-Aneks II, zbog neusklađenosti između prijavljene imovine u Izvještaju o imovinskom stanju, podnesenom dana 12.01.2022. godine od strane nosioca javne funkcije Komisiji za odlučivanje o sukobu interesa

i podataka prikupljenih od nadležnih organa i institucija o nekretninama bračnog druga nosioca javne funkcije kao i podataka o pokretnim stvarima bračnog druga nosioca javne funkcije vrijednosti veće od 5.000,00 KM, jer nosilac javne funkcije nije prijavila, odnosno u Izvještaj o imovinskom stanju nije tačno i potpuno unijela podatke o nepokretnoj imovini bračnog druga, tačnije nekretninu označenu kao parcelu, broj: [REDACTED] ([REDACTED]), „EŠ“ [REDACTED], dvosoban stan 50, u površini od 62 m², upisana u poduložak, broj: [REDACTED], etažni uložak, broj: [REDACTED], zemljišnoknjižni uložak, broj: [REDACTED] za k.o. Brčko 1, vlasništvo V.S., bračnog druga nosioca javne funkcije sa dijelom 1/1.

Osim toga, uočena je neusklađenost između prijavljene imovine u Izvještaju o imovinskom stanju-Aneks II i podataka dobijenih od strane Odjeljenja za javni registar Vlade Brčko distrikta Bosne i Hercegovine u dijelu da nije u Izvještaj o imovinskom stanju unesen pmv. marke ŠKODA, tip: 5E, registarskih oznaka: [REDACTED], godina proizvodnje 2013. vlasništvo V.S., bračnog druga nosioca javne funkcije, a da je vozilo vrijednosti veće od 5.000,00 KM, čime je postupila protivno odredbi člana 19. stavovi (1) i (2), te odredbi člana 20. Zakona o sprečavanju sukoba interesa u institucijama Brčko distrikta Bosne i Hercegovine.

Nosilac javne funkcije je istim zaključkom pozvana da Komisiji za odlučivanje o sukobu interesa dostavi izjašnjenje u roku od 15 dana od dana dostavljanja zaključka.

Nakon prijema zaključka o pokretanju postupka, broj: UP-I-KSI-09-26/22 od 21.12.2022. godine, zaprimljen 12.01.2023. godine, M.S., poslanik u Skupštini Brčko distrikta Bosne i Hercegovine, kao nosilac javne funkcije je dana 26.01.2023. godine dostavila Komisiji za odlučivanje o sukobu interesa pisano Izjašnjenje u kojem, između ostalog, navodi da je stan površine 62m² u vlasništvu njenog supruga, da je prijavljen u podnesenom Izvještaju-Aneks II za 2021. godinu, ali da automobil nije prijavljen, budući da je krajem aprila 2021. godine automobil marke Toyota Auris, 1.4 benzin, godina proizvodnje 2007. prodat, nakon čega je kupljen automobil ŠKODA OCTAVIA 2.0.TDI, godina proizvodnje 2013., pa je tako učinjen nenamjeran propust.

M.S. obnaša funkciju poslanika u Skupštini Brčko distrikta Bosne i Hercegovine, na osnovu Uvjerenja Centralne izborne komisije Bosne i Hercegovine, broj: 06-1-07-01-2103-2-3188/20 od 15.12.2022. godine, te je shodno članu 2. Zakona o sprečavanju sukoba interesa u institucijama Brčko distrikta Bosne i Hercegovine nosilac javne funkcije i upisana je u Registar javnih funkcija i nosilaca javnih funkcija.

Članom 19. stav (1) Zakona o sprečavanju sukoba interesa u institucijama Brčko distrikta Bosne i Hercegovine propisano je da je nosilac javne funkcije dužan u roku od 30 (trideset) dana od dana stupanja na javnu funkciju, podnijeti Komisiji Izvještaj, za sebe i bračnog i vanbračnog druga, djecu, druge članove porodičnog domaćinstva kao i lica prema kojima nosilac javne funkcije ima zakonsku obavezu izdržavanja, prema stanju na dan kada je izabran, odnosno imenovan, dok je stavom (2) istog člana, između ostalog propisano i da Izvještaj sadrži lične podatke nosioca javne funkcije i članova njegove uže porodice, uključujući JMB, podatke o funkciji koju nosilac javne funkcije obavlja, dok je tačkom b) istog člana propisano i da sadrži podatke o imovini, uključujući novac, račune u banci, poslovnu dokumentaciju, dionice, vrijednosne papire, obveznice, nepokretnu imovinu, stanarsko pravo i drugu imovinu i dobra u vrijednosti većoj od 5.000,00 KM, u Bosni i Hercegovini i inostranstvu.

Primjenom navedenih zakonskih odredaba na utvrđeno činjenično stanje, ocijenjeno je u konkretnom slučaju da postoji povreda odredaba Zakona o sprečavanju sukoba interesa u institucijama Brčko distrikta Bosne i Hercegovine, s obzirom na to da M.S. nije u Izvještaju o

imovinskom stanju podnesenom 12.01.2022. godine Komisiji za odlučivanje o sukobu interesa unijela podatke o vlasništvu supruga, bračnog druga nosioca javne funkcije nad gore navedenim stanom i automobilom, čime je postupila protivno odredbi člana 19. stavovi (1) i (2) te članu 20. Zakona o sprečavanju sukoba interesa u institucijama Brčko distrikta Bosne i Hercegovine.

Uvidom u Izvod iz matične knjige vjenčanih Odjeljenja za javni registar Vlade Brčko distrikta Bosne i Hercegovine, broj: [REDAKTIRANO] od [REDAKTIRANO]. godine utvrđeno je da je nosilac javne funkcije M.S. u Brčkom dana 31.12.2011. godine zaključila brak sa V.S., te je zbog toga obaveza nosioca javne funkcije unijeti podatke o imovini svog bračnog druga u Izvještaj o imovinskom stanju.

Član 38. Zakona o sprečavanju sukoba interesa u institucijama Brčko distrikta Bosne i Hercegovine propisuje sankcije za nosioca javne funkcije koji postupi suprotno odredbama navedenog Zakona.

Komisija je, shodno članu 39. Zakona o sprečavanju sukoba interesa u institucijama Brčko distrikta Bosne i Hercegovine, prilikom odlučivanja o vrsti sankcije koju treba izreći u konkretnom slučaju u obzir uzela sve otežavajuće i olakšavajuće okolnosti kako bi izrečena sankcija odgovarala učinjenoj povredi Zakona. Kao otežavajuće okolnosti, Komisija je cijnila činjenicu da je M.S. počinila dvostruki prijestup, jer nije prijavila ni stan ni automobil bračnog druga, pri čemu Komisija apostrofira činjenicu da u rubriku Aneksa II „Podaci o nekretninama“ nije unijela nikakve podatke, a razumno je očekivati da živi u nekom stambenom objektu. Nadalje, ista je navela u svome Izjašnjenju od 26.01.2023. godine da je predmetni stan prijavljen u Izvještaju za 2021. godinu, nakon čega je Komisija obavila ponovni uvid u podneseni Izvještaj iz kojeg proizilazi da stan nije prijavljen. Osim toga, M.S., kao nosilac javne funkcije bila je dužna prijaviti dopunu Izvještaja za kupljeni automobil, shodno odredbi člana 21. stav (1) tačka b. Zakona o sprečavanju sukoba interesa u institucijama Brčko distrikta Bosne i Hercegovine. Kao još jednu od otežavajućih okolnosti u konkretnom slučaju Komisija cijeni činjenicu da M.S. obnaša funkciju poslanika u Skupštini Brčko distrikta Bosne i Hercegovine, te je samim tim bila upoznata, odnosno morala biti upoznata sa pomenutim Zakonom, jer se na sjednicama Skupštine Brčko distrikta Bosne i Hercegovine, a na kojima i sama prisustvuje upravo raspravljalo o načinu i posljedicama donošenja istog. S druge strane, od olakšavajućih okolnosti, Komisija je cijnila da je M.S. blagovremeno dostavila Izjašnjenje na zaključak, zatim da se radi o prvoj povredi odredaba Zakona od strane imenovane te da je i automobil i stan prijavila u Izvještaju za 2022. godinu. Imajući u vidu sve naprijed navedeno, odlučeno je da se izrekne novčana kazna obustavom dijela isplate neto mjesečne plate, odnosno naknade, koju nosilac javne funkcije prima za obavljanje javne funkcije u iznosu od 10% (deset posto) neto plate, odnosno naknade kako je to navedeno u stavu (2) izreke rješenja i da ista u potpunosti odgovara težini i posljedicama povrede Zakona.

Komisija je, cijeneći sve dokaze pojedinačno i u međusobnoj vezi, shodno članovima 4., 25. i 39. Zakona, donijela rješenje kao u dispozitivu.

Odluka Komisije bit će objavljena na službenoj Internet stranici Komisije.

POUKA O PRAVNOM LIJEKU:

Shodno članu 37. stav (1) Zakona, ovo rješenje je konačno u upravnom postupku i protiv istog nije dopuštena žalba, ali se može pokrenuti upravni spor u roku od 30 dana od dana dostavljanja rješenja, tužbom pred Osnovnim sudom Brčko distrikta Bosne i Hercegovine.

Predsjednik
Komisije za odlučivanje o sukobu interesa

Admira Mujić, dipl. pravnik

Dostavljeno:

1. M.S., Brčko distrikt BiH,
2. Internet stranici Komisije,
3. Evidenciji i
4. Arhivi.